

四庫全書

集部

欽定四庫全書

應齋雜著卷四

宋 趙善括 撰

疏

天申節功德疏二首

千齡啟運式符真主之興萬國同心共効封人之祝爰
臨令節祇歆真祠載揚玉笈之文仰企璇霄之鑒恭惟
光堯壽聖太上皇帝陛下功成不宰道妙難名垂精三
紀之間冠德百王之上宜形善頌茂對宏休伏願壽考

萬年本支百世貽孫謀於有永固皇祚於無窮與天為
徒超物之表巍巍蕩蕩邁堯帝之難名繼繼承承享周
家之過歷

冬迎於郊式屆就盈之月帝出乎震甫臨載夙之辰凡
曰戴天敢忘祝聖爰啟清真之館敬披琳瑯之文禱祈
既浹於三旬滿散欣逢於令節再伸丹悃冀集鴻休恭
惟今上皇帝陛下上纂堯仁躬行舜孝無一物不得其
所致萬邦惟正之供伏願業並山河壽同箕翼周家千

七百國行歸輿地之圖天皇萬八千年請效封人之祝
會慶節啟建䟽

應名世之五百年果生睿主祝皇齡之千萬歲願效封
人式紀宏休仰憑大覺恭惟今上皇帝陛下親承慈訓
允繼重明本一道以相傳奄百王而獨冠將臨令節特
啟真乘潔蒲塞之珎羞演金仙之秘旨伏願壽如箕翼
德合乾坤共歸有道之長永嗣無疆之歷華夏蠻貊皆
率俾同一視於堯天山川神祇莫不寧聽三呼於漢嶽

祈雨雪疏

愆陽既久訝逢雪之何遲有衆皆驚見同雲之誕布謹
輸愚悃仰扣佛慈伏願洒一枝水而遍滿河沙剪六出
花而開成瓊玖預卜豐穰之兆潛消疫癘之災急舞回
風應一陽之順序尺堆平地首三白以呈祥

祈雨雪疏

冬無愆陽偶罹亢旱佛有惠力普濟衆生比申悃悞之
私嘗扣圓通之聽未蒙休應益究精誠輒修供於精藍

謹祈哀於覺蔭伏望發常圓滿願興大慈悲心施法雨
以潤澤焦枯散天花而莊嚴世界瑠璃瓶內瀉洵湧之
春濤楊柳枝頭集紛紜之瑞霰一同蒙惠三白呈祥

禮彌陀疏

恭惟淨土遠在西方釋迦過去而彌勒未來觀音在左
而勢至居右設九蓮之妙品以度衆生發十念之信心
定登彼岸伏念某委形五濁結愛十纏身口意既集於
罪因上中下難逃於業對知佛慈之可賴生誓於歸依

惟慧力之無違死必蒙解脫夢幻泡影識火歸空圓覺
聲聞念生即應令俯當二七皈禮一乘去十萬億之迷
塗徑生樂國面三十二之好相速見導師

新建縣請光孝長老疏

臨濟十方坐斷總是道場徑山一句曾提都稱法嗣源
流既別貞偽奚分要知本分家風自有天然我子詮公
和尚密傳心印明續惠燈不惟有振地耳根最好在撩
天鼻孔無弦琴彈到妙處沒縫塔直要立成既專呵佛

罵祖之威宜有說法為人之意一轉語廓然微露二大
臣翕爾相知執拂豎拳已見立僧手段撞鐘擊鼓便呈
出世風流政虛光孝叢林敬俟應緣餅錫一條挂杖挑
取虎丘月來百尺竿頭吸盡西江水去

請慧日長老疏

說法為人已會西來之意隨緣應物不妨東渡之游正
禪席之久虛僣真風而再振真州報恩堂頭禪師道凝
覺照性徹靈源踏禪關即解安禪盡世法故能出世已

見一拳發露豈惟百里聞風淮上五年化成佛國桑間
三日恐墮疑城琴川雖號小邦慧日實為巨剎暫勞一
葦來建叢林共忻飛錫之來端若慈航之濟下喬木入
幽谷方是道場架大屋養閑人佇觀法力

請西竺剖老疏

寶月不能長圓有盈有缺慈雲所以徧覆非去非來世
無丈夫天人師誰識如來法眼藏東吳勝地佛意何私
西竺上方宗風偶息剖公長老臨平首席靈焰後身嗣

妙喜拗折竹篲祖楊岐接破栗棘便是天下奇男子更
無人世老婆心只此當仁何勞選佛孰為檀越繫宗子
之維城敬請焚修祝聖人之萬壽

贊

喜神贊

畫筆雖工人言未至妙物難模初非口體子思正心顏
淵克己言且不傳况茲繪事

自題像贊

是子趙子竦然其容非子趙子澹然其中俾之軒裳為
卿為公放之漁樵為叟為童齊得失於陰夷絕喜怒於
窮通不能充陳仲子之操庶幾聞柳下惠之風

戊戌十月初四夜夢作彌勒贊

巨耐這箇彌勒要向此中作賊當初打草驚蛇而今緣
牆穴壁手裏這條拄杖便與鞭臀打脊幸然遇我慈悲
且與一時放釋

跋

御筆跋

某年月日皇帝御筆賜臣某臣某等竊謂堯浸稽天湯
焦烈石當是之時人無饑色下無怨咨者無他術焉考
之典謨不過乎憂民深慮患遠備先具而已恭惟陛下
堯道日行湯聖日躋御天繼統垂二十年三光全而寒
暑平五穀熟草木茂駸駸然入於泰和之世矣邇者諸
郡雨暘或不時上貽聖慮宵旰焦勞發倉廩蠲租稅惟
日不足又乃親灑宸翰俾臣等戒諭民間廣布二麥可

謂憂深慮遠備先事以為具雖堯湯之心殆不過此顧
臣等庸頓何足以蒙之然職在撫摩敢不仰體德意遍
曉民編有地必耕無田不治庶幾有以稱陛下惠愛元
元之意王言大哉上當天心一臘三白已協嘉應兩岐
之詠同穎之篇願繼此以為獻謹拜手稽首刻於金石
將使寰海之民知聖帝明王之用心如此

跋昭陵諸朝相與素中丞帖

汗青所載建儲之議始於先正司馬公倅青州之日今

觀魏公帖乃知盡出於袁公父子炯炯勲績垂亘千古
宜與我宋共享無疆之休十利三害惜乎未之見也

跋袁中丞與韓魏公唱酬芍藥詩

生予之先窮達相許以氣誼故無言不酬生予之時窮
達相視以勢利故惟炎是趨予不知生予之後者風俗
又將何如也噫

趙清獻帖跋

居今之世慕古之人要當得其用心如何耳噫古人不

得而見之得見其筆語斯可矣由其手澤想其用心是亦今之古人也陶彭澤之詩發言古澹誦其言則知其忘機械脫風塵邈乎其遠矣顏魯公之書立法端莊觀其字則知其抱忠赤秉節義確乎其敬矣清獻趙公林泉遠致鶴琴逸樂不知軒冕之足貴故詩有淵明古澹之風霆裂姦膽霜清物心不知儀表之自正故筆有真卿端莊之體合是二者萃於一帖正襟危坐伏而讀之肅如也超思遠想緬而慕之澹如也况夫一時從遊之

士更唱迭和目受心傳固可以類推焉都官張公其人也今耳孫家傳此帖三世不失觀其安時處順不以利勢汨其心見義思勇不以貴賤易其操豈非探此帖以得清獻與其祖考之用心耶敢憑卷末告於其後之人

陰德記跋

竊觀范文正公作燕山竇十郎陰德記首舉其遺金還主而已後乃有一椿五丹桂之詩今數文陳公作乃祖

戶曹陰德記獨稱其忘憾掩過而已後亦有子孫二十大夫之夢得金還主忘憾掩過皆細事也君子長者於其細事不敢忽況其大者乎由是推之一動一言始終其身無非盛德事矣天之報應豈苟然哉

題辛參政手澤

蘭穆舅父壯年抱恢復中原之志未見於用得孫賦詩人徒知其喜而不知其感也懼其老將至而功未成爾故曰子舍有孫添老大鄉關無路任漂浮觀者試味其

句

翟侯行狀跋

伏讀少傅翟公行實觀其揮弓厲聲合水頓解以陷渡
河之敵朝謁陵寢枯河忽湧以止軍士之渴視王霸之
於滹沱廣利之於大宛過之遠矣嗟乎忠孝之名立豈
臣子之幸哉公之大節為臣死忠為子死孝載之汗青
與古匹休至於誠心格物天地為之變動則繇古迄今
未之聞焉予故表而出之

墓誌

趙運幹墓誌銘

同姓兄可大以字行諱伯術藝祖皇帝七世孫也曾太
父世顯封康國公謚安惠夫人康氏大父令實贈少師
夫人張氏父子照故從義郎夫人武氏兄人物秀偉資
性明敏刻意問學淹貫羣書紹興初戎馬甫定入豫章
郡庠廩鹽勤苦以夜繼日文業大成屢冠多士繼中取
應科調監婺州蘭溪稅退食之餘手不釋卷再中戊辰

進士第易左從事郎為紹興府察推裨贊郡政有疑必
決領顯仁皇后攢事務百物整辦民不知擾賞循文林
郎再入金陵幕值敵騎侵軼淮甸留臺應辦錢糧四十
餘萬無闕督府招致預議軍事敵師潛遁法當贖庸會
罷府而止又為婺州推官自負知兵度敵有可乘之機
上書獻恢復計指柄用者不急事功鯁訐無顧忌謫宜
春淳化改元恩聽自便浮家泛宅遇山水佳處登臨竟
日有客必飲每飲必醉醉後纚纚譚世務掀髯擊節抗

慨自嘆惋間則賦詩以自適未幾起為平江軍節推秩
滿奉祠復為豫章幕官同正員刑清訟簡一郡攸賴慶
典循儒林郎甫及瓜就除湖南計屬淳熙十五年春正
月到官三月忽感隱疾招某而告之曰伯術生平蘊抱
萬未一試有憂國愛君之心而不得見於用有裕民強
兵之術而不能行其志履忠信而獲罪竭材智而招謗
撮髮中二科兩試宏詞卒老選坑豈非命耶以故不復
問家事先妻郭氏客死未葬今婦吳氏弱孤師崇且不

惠師崧復多病師隆四歲耳奚能為長女適吳氏子遠
不相及幼未及笄未能嫁此疾如不起生有養死有葬
奈何某曰兄神凝氣正必未爾設有不諱敢不盡力四
月立夏值某以檄祀南岳十有一日始還長沙接踵以
病亟告及聞見其舉首張頤似有所待僅發數語已而
默然是夕卒享年六十有八計臺師聞聞之悲悼兄高
風誼氣篤厚僚家賙贍豐給充濟存歿適某當代因奉
其柩以歸豫章告於連帥先售其僦居之舍繼給以孤

遺之俸使存者安其生矣然後卜吉於灌城鄉東山之
原將以是年十一月十五日畢襄奉事仍以前夫人郭
氏祔焉須城馮有翼狀其行甚備某謹撫其歲世為銘
以哀之曰軒軒野鶴鬱鬱澗松太剛則折多言數窮雖
劉向之諒直何李廣之不封已矣乎才命難逢古今所
同秘藏於斗牛之墟庶幾化延平之龍

黃公墓誌銘

阮岡黃氏族望於豐城以才顯者魁天下以利達者甲

鄉里維贈通直郎諱檢者不繇科第不殖財貨名尊而
家給子粦世令德孫肅守義種仁尤著譽鄉族曾孫公
遠明仲少年讀書落筆角立諸先生上先君才之歸以
女弟朝廷恩厚同姓授子壻官明仲不說曰我家業儒
尚畏一第溷豈顧婦家名耶竟不就後兩失駿雛忽忽
不樂寄詩酒為跡以篇詠佐壺觴門無蹄轍捉杯笑語
畧多自醉相羊林麓間岸巾跼屣志操直欲凌雲御風
視人世為勞也未幾沾疾臨終付家事了了乾道丁亥

仲冬己丑卒享年三十有六二穉子曰壽孫德孫三女
長未及嫁幼始孩二十有七日塋於神塘之原乃銘之
曰德為祖仁為父實踵芳緒無生榮無死懼遠超世故
招修谿踞崇阜於呼黃氏子之墓

吳隱君夫人萬氏墓誌銘

夷考今昔為人婦者咸知愛已之親鮮有事人之親能
極其愛情固然爾縱強能之率容敬心悖始確終替能
孝者鮮矣求其自少艾訖老死未嘗不父母其舅姑者

又鮮焉南昌吳隱君之才之夫人萬氏少而賢為婦有
孝聲工於剪製結縷性勤儉溫懿事隱君父母惟謹油
然恭順若生已者舅喪哀甚篤侍太夫人行日益著久
又失所天秉操愈戒雪霜在鬢雲采滿目曾無惰容雖
耄病常若新婦時省飽定寐心惕惕然惟日不足乾道
元年十一月二十一日太夫人盡壽幾百思怛痛深食
如待寢如失後八十日夫人亦終饗年七十有八噫六
十年躬婦道為婦之令可謂甚矣子大任兩被辟攝不

就孫琳珪璋璵琛璣岐嶷善讀書孫女長德歸宗室之
英公鼎亞適羅炳一幼未嫁曾孫四人將又六十日啟
隱君之室合其室孤哀雪泣來求銘余家與吳氏猶朱
陳焉余宜為銘曰壽而考室其孝儉而勤揚其芬猗嗟
夫人匪躬匪親宜膺乎後人之身

祭文

祭涪州王守文

嗚呼天寶難諶命固靡常天不必凶壽不必臧公之云

亡六有可傷躬蘊盛德夙著休光履仁蹈義胡不壽康
游部郡符政譽昭彰憂國愛民胡不福祥于門方高惟
序成行陰功陽報胡不熾昌祖宇之傍始植華堂一日
未居而寘公喪委身異鄉萬里歸艱巫峽灩澦百態驚
惶呱呱之幼眾眾之孀傳業起家日引月長莫詳至理
擬問彼蒼有一於此恨已難量况茲六者公乃備嘗嗚
呼哀哉某等從游里閭出入門牆寂然聲容痛矣肝腸
一觴叙哀有淚如滂

祭漢陽趙守文

一江中分兩郡對峙民社則同大小或異公臨西州政
由簡易士仰清高民稱豈弟我來東壘適繼積敝百孔
千瘡神疲力悴方資教言庶或有濟人傳公疾勿藥以
冀言未迄辰遽以訃至嗚呼哀哉仙源同盟鴈塔俱第
江湖一麾又如魯衛永惟明德深念情契西隣潛然痛
不自制山雲凝愁江水流淚郡組有拘素幃莫詣遣奠
一尊永決千世

祭趙運幹文

嗚呼予兄宗室之英才高氣銳騰實蜚聲憂國如家愛
君如親懷忠秉直上書漢廷歷詆宰相嘲哂公卿忼慨
論事叱咤譚兵遠恐誤國近惡欺君言如著龜物無遁
形竟謫宜春久屈莫伸在漢之時有若賈生慟哭之書
一鳴驚人長沙見疎弔湘問程宣室召還亦略施行堂
堂我朝胡公邦衡下斥權相上逆龍鱗放之海隅與死
為隣一旦東歸亟登神明富貴壽考五福兼并哀哉我

兄言有典刑事皆合符宜膺寵榮僅為計屬卒死選坑
無命奈何難以力爭人患才少姓累宗盟胸中盤屈磊
落不平酌此一觴安於佳城

雜著

祈雨龍王文

農之播種耘植非水則不能施其力神所知也今三時
在候農事正亟而雨不降溝渠已涸浸灌已乏民告勤
而無補吏欲救而無術不禱于神則吏亦何所施其力

耶惟侯受君爵命饗茲廟食當鑒誠懇陰賜其惠悠然
而雲沛然而澤以除民之病以紓吏之責此亦侯之職
也俾歲有成則闔境之民感侯之惠永永無斁矣

謝龍王文


民以病告吏以誠禱神以靈報此上下有相須之理幽
顯有必通之道粵秋七月旱則苗槁民以病告於令令
以誠禱於廟神意昭格響答殊效雖未有報神之功敢
為歌詩侑其觴而為之導歌曰雷鼓兮轟轟舞雲靈兮

掉霓旌電鏡兮眩眩耀珠宮兮翻貝闕翳日烏兮金紫
銷落河魚兮銀海潮南畝盈兮龜兆潤大田秀兮蝟毛
奮禾黍兮芄芃時和兮歲豐昔侯來兮萬民徯今侯歸
兮千里喜秀麓兮蒼巒方池兮翠壇簫鼓聲兮奠芳酒
香火緣兮期永久聽吾民兮奏侯功錫鎮玉兮蒙帝
封

告諸廟文

神受天之令吏受君之命神司萬姓之禍福吏主百

里之利病既並行而不悖宜有求而皆應神之垂聽將
以輔吏之政吏之始至敢不修神之敬



欽定四庫全書

集部

應齋雜著卷五

詳校官庶吉士臣何道沖

主事_臣呂雲棟覆勘

謄錄貢生臣王兆泰

謄錄監生臣朱起鳳

欽定四庫全書

應齋雜著卷五

宋 趙善括 撰

五言古詩

和邦承所贈中隱古風

少年麋鹿姿待價非結綠東湖嗜紅芰西山茹黃獨雖
無負郭田僅有環堵屋稍知親簡編豈意分符竹不作
梁甫吟徒歌采薇曲軒冕本無心泉石慕幽躅疎才偶
計偕微名玷宦牘擾客書掣肘蹈險車脫軸爲米一折

腰獻玉三則足人情冰復炭世路爲谷奔走三十年
塵埃幾千斛歸訪舊園林要識真面目敝廬他人居故
友半鬼錄誅茅傾客囊十日笑神速堂成屢留醉夜闌
更秉燭冬霜孤松秀春霖萬花霏薰風自生涼秋雲不
待族魚鳥樂欣欣柴荆紛檄檄曳杖時往還拊缶誰拘
束敲門聞剥啄開緘佩謙牧初讀少陵詩再對淵明菊
試聽句擲金坐想人如玉搜腸嗣高吟深愧窘邊幅

和羅倅竹園唱和之什

平生抱迂疎舉世無兩箇每爲饑所驅奔走不可奈嘗
聞伯夷風粗爾立頑愼初試巖邑宰再作侯藩佐一麾
來江湖不容暖席坐流行遇坎止留落寓江左軻毀遭
臧倉孔厄類陽貨從來宦情薄況已心力惰二兒可應
門肯堂復肯播東湖五畝宅喜賦歸來些林亭足遐觀
竹齋宜醉卧自謂景物幽絕唱無人和謁來憩水濱光
淥靜無浣一見羅夫子道眼俱看破始知蟻蝶飛未識
天壤大萬竿旌旗林五車牛馬馱羨君如籍咸媿我非

白賀續貂慙斐然君恕母督過

清明後一日泛湖遊園聯句

清明過一日甲子喜新霽理櫂汎平湖

趙吹風掃微曠

巧剪翠縠紋何忽展畫屏勢千里八寸眸

吳萬物猶一

贅寄傲天地闊

郭

放意江山麗指點村市井

張

蕩漾漁

家計小泊楊柳堤

趙

徐行蘭蕙砌滿月射堵牆

何乘風

暉雲髻彩舟簫鼓喧

吳

花亭翠紅蔽石龍漱寒玉

郭竹

鳳搖清簪鬧花如有言

張

閑草遠無際梅豆點微酸

趙

櫻珠綴纖脆
荇帶牽風長
何鷗雪點波
細怪山疊青巒

吳仙巖排綠桂
親友宴樽俎
郭泉石爽襟袂
曲徑濃香

浮張深院幽人憩
日暖蜂蝶喧
趙沙軟鴛鴦儷
春秀猶

未晚何懽遊
端可繼歸舸
泝洄湫吳嘉圃
芑林翳景勝

詩愈豪
郭酒闌情未替
解帆紵別墅張尋芳適佳第
畫

樓月初挂
趙朱欄春可繫
燒燭照紅粧
何墮簪空綠鬢

笑歌誠有餘
吳金貂尚能貫
醉墨寫歌歎
斜錦囊收短製

郭

和浙憲同諸公遊梅園

梓里德星聚寶馬如雲屯揚鞭東城去趁此梅正繁林
烟引輕素暎曖連遙村須臾日色高客情舒宴溫露晞
潤玉瀝雪粲融朝暾千林秀松竹萬點鋪蘭蓀開落犯
春早塵埃迷晝昏埋沒顏色好孤負眉宇軒疎野空自
適何人共清尊諸公盡豪雋逸飲如鯨吞對花相慰藉
悲歡俱勿論吹噓賴椽筆欲謝終忘言

庭除大槐安人世甚蟻屯俯仰穹壤間樂少憂且繁何

如置悲歡訪梅東城村羣賢負瑰奇即之和氣溫峭寒
著春衣輕烟翳晨暝簪花愧華髮席地依香蓀誰許嫁
東風留香坐曉昏密塢橫清溪我欲弣幽軒所願花長
開日日同一尊靜對影亦好清味盡可吞此心無厭時
何物堪比論哦詩愧續貂勿以人廢言

七言古詩

和伍解元喜祈雨有感

癡龍偃蹇玩歲月深居白雲抱幽石有時江海肆貪殘

坐視天焦地皮拆分疆守職各有方止沸詎可揚其湯
曰暘而暘雨而雨何待酹酒焚爐香不謂神心有城府
必需精禱方降雨刑鵞割牲厭口腹緇衣黃冠誦章句
上天有意生斯人假爾羣祀江之濱弄權推怨各所施
帝怒碎戮猶微塵吁嗟癡龍今已矣異日憂深目前喜
勿將風雨希民求歲歲豐穰盡天賜我家亦有二頃田
膏澤霈然長有年神心儻不悖天意與民共賦噫嘻篇

過金陵有感和韻

五馬渡江思典午祖龍謾鑿秦淮浦未登三代盛明時
曾是六朝文物祖中興事業由憂勤風流千載還芬薰
謝安王導亦可罪至今遂使南北分

紀遊

幾重濃雲潑黑墨數點疎雨飛的皪桃花李花紅更白
不覺東風掃蹤跡深山綠暗新樹密懸崖倒掛春空碧
泉聲瀉出萬霹靂長虹飛過三百尺蹇驢倒騎回語客
目端春事俱可識茅舍敲門傾琥珀古寺擊鼓非玉食

我今已飽天工力風吹浮雲露白日崎嶇不復厭登陟
高處更窮低處逼下瞰羣峰五頑石回首一笑天地窄
興來策杖遶山側竇深巖遠不可側相思澗邊酌寒滴
一抹暝煙壯山色尋真不見空回憶使我傷今復傷昔
道人山房遍幽歷醉裏疑從仙籍謫釣天廣樂夢中得
更問騰空好消息

樂塘鋪和周師禹韻

遲日醉花春影長村醪引入無何鄉碧林啼鳥驚夢斷

行客紅塵吹去忙，憂心悄悄誰知道。且是不關春事了，
雨暘今歲定豐年。慇懃更問農家老。

奉和章冠之長蘆壁間韻

征帆來去方旁午，觸我扁舟維荻浦。疎林隱約響鐘魚，
一葦可航參佛祖。西風留客意如勤，永日閑消一炷薰。
詰朝霜重風力軟，千里翠轂并刀分。

追和外舅郭倅定香院題詩

我家冰清酒星魄，倏忽筆下驅雷風。萬里去家煙瘴裏，

一行作吏簿書中高才不許在廊廟仙跡且復歸瀛蓬
聲容杳杳水天闊目斷波底斜陽紅

和張尉食字韻

玉杯春酌金盤食曾憶雪香同醉色歸來信宿未能忘
欲洗羈懷亂愁織青山相對雲歸堂一觴聊爾非瓊漿
羨君佳篇效伯良要知使我搜枯腸

謝葛守詩軸

君不見靈椿一株傳義方僖儀接武躋金堂又不見老

蘓獨步爲文主軾轍聯芳入瓊府始知盛德天所親于
門榮戟高拂雲又知碩才世所貴鯉庭詩禮超凡羣司
成蘊蓄何如厚萬頃淵源海波秀劉郎少俊首辱和揚
善推賢宜有後司成問學何如深六經表裏金玉音王
氏拘攣了無取雄文傑句由諸心廬陵昔歲曾分教甲
子一周夢驚覺賢郎賜得銅虎符今日重遊想前效黌
堂咳唾遺明珠翠琰刊成惠陋儒請爲野史進青瑣要
繼皇朝實與蘇

送外舅杜侍御使陝西

建隆以來論人物得士與古相低昂人才歷數仁祖世
後生菟瑣無復望老成寂寞典刑在杜公玉立映班行
少時學問聖賢說松栢歲寒觀老節得官烏府不須臾
正色空間動帷閨鑠金衆口未必然天與石城慰蕭屑
王師頃縛山西酋朝廷却懷西顧憂涼州旄鉞何足恃
岐隴須公勤傳郵平生經國有雅意乘流得坎惟所植
作官施設要近民金馬嚴徐等兒戲詔書寬大人樂生

吏民安業政令行金城那可無粟守堯舜與民寧並耕
茶鹽資國何必古俗儒徇民不知務精神折衝在本疆
要以雍容待倉遽知無不爲公自期豈弟君子神所私
秦山渭水照車馬屬城列縣觀威儀此行屬仕良不惡
金魚新佩明光墀誰言直諫居同少淮南盜鑄煩撫綏
時平王度式金玉歲晚汲公還見思

真妃祠

碧潭無底潛蛟龍神居下宅琉璃宮一水鏡莫撓不濁

兩山角抵常爭雄。鴉啼古廟樹色黑。魚躍急湍波影紅。
鬢霧鬟烟森拱竦。棟雲簾雨飛冥濛。蕙有時展朝暮奠。
蒲席快分南北風。假威老巫腹恣飽。乞靈行客心潛通。
無求小舸疾飛鳥。不恨孤蹤成斷蓬。去秋淞右盡淹沒。
今夏江西尤蘊隆。尾銜萬斛去不返。鱗次十倉皆屢空。
農背赤裂魚釜滿。田毛焦枯龜兆同。炎官張皇掉旗旆。
海若羞澁藏冲融。一方雖藉訶護力。四海正思霖雨功。
片帆短棹利極細。醲酒割牲醺易窮。好來雲車命箕伯。

去擊雷鼓驅靈露晶熒燭物掣長電割勒掃空消霽虹
不須犀角照百怪何待牛蹄翻巨缸挽起天河盡傾瀉
坐令人物還熙豐笑談可活萬民命頃刻已回元氣工
上帝報功賜褒勅真妃錫號榮清躬元圭華袞依約裏
介族水類驅馳中山高水深千萬祀南面血食無時終

五言排律

上王右司三十韻

牛角從親後樞衣拱座隅辭章窺雅制翰墨景良模零

露哀先德青雲激壯圖睽違十五載流落二三孤蹇澁
憑鄉薦崎嶇達上都芝眉重晤對桂籍偶叨踰勞苦溫
言重開明鄙性迂一雷初綰綬千里遇分符琴浦催科
拙澄江德政殊美瓜滋灌水良醞寄兵廚社雁驚飛楚
邊鴻不到吳色辭思益遠憂患痛多虞風樹親難待林
泉誓與俱啼號真有累韁鎖復相拘華節來臨鎮荒城
獲走趨二天蒙庇覆半載幸馳驅郡政慚輜蓋民歌愧
袴襦深期展四體寧復顧微軀厚意平生在高風振古

無親依方款密聚散忽須臾鷁首浮仙路烏臺接禁塗
茗溪雖近甸宣室賴嘉謨德威應難外民思覬少蘇甘
泉躋法從膏澤下寰區自歎如巢幕人憐數守株寸心
隨履鳥隻影在江湖鳥倦一枝穩龍須大手屠閑情驗
焦鹿浩思憶蓴鱸已困三眠蠶還窮五枝鼯楓宸清問
處回首念疎愚

五言律詩

題古圳鋪

去郭十五里依山三兩家剪茅成棟宇沽酒是生涯雨
過鳩休婦日斜蜂趁衙親門今咫尺停夢看燈花

結茅守冢偶攜子弟散策郊遊有感借用壁間
韻

天地一蟻磨人生何日閑此身真土木到處即溪山血
點居苦淚衣餘戲綵斑春遊板輿在無復奉慈顏

再用前韻

蠖屈地容壯鳥還天宇閑漁樵苕水市薇蕨首陽山爰

下金貂友林中玉笋班誰能齊萬物爲我辨彭顏

題定光壁

護雨雲初斷登山眼便明楓彫丹舞葉松古綠搖聲覺
宿無窮老禪關有底清小春天不冷歸路尚餘情

和龔同叔春日即事五首

苦雨不肯霽花愁都落紅老農欣歲兆游子恨途窮寒
尚衣難褪春侵酒易中城頭喧角弄輕度一簾風
柳綿飛撲撲荷葉散田田物幻無窮意春歸何處天事

隨鸞鏡改人逐燕巢遷一笑千金價吾羞魯仲連
鶯簧方報暖鳩喚未容晴新漲長還減癡雲暗復明我
生隨分樂春事有餘情聞道東湖好相邀散策行

春已堂堂去那聞杜宇啼江山驚異土桃李謾成蹊我
自無心了誰能與物齊功名儻相貸深卷碧雲溪
邂逅相逢好初心各壯圖金蘭期永好銀艾願同紆恨
逐芳樽遣情煩綠筆鋪風雲偶然會攜手上天衢

世事二首

世事今如此惟堪一笑譁空持衝斗劍安得上天槎遠
信憑飛翼流年付落花平戎須大度何必顧纖瑕
我貧非道病生計惘然疎數畝田常旱一溪雲有餘幸
無貧外樂贏得靜中虛已斷聲華念臨深肯羨魚

再用前韻

枕席方相好兒童且勿譁窓蕉鸞曳尾簷樹鵲鳴槎有
客談飛屑無才筆吐花倦餘題短句誰爲指瑜瑕
我是忘機士初非學二疏笕醅常得醉瓶粟任無餘天

下衆生病山中四壁虛昔年芻豢口今日伴鐘魚

遊香社寺

山水興方逸塵埃縛暫寬菜腸甘久素酒頰助微丹江
闊煙光薄霜滋葉暈殘不妨走幽寺或可叩禪端

清明偶題

曲沼一泓碧亂花雙徑紅歌梅驚北客舞柳認東風欲
買春無價常令酒不空我生隨分樂初不問窮通

同王秘校和同年五使君韻餞送嚴文守江陰

江左詞章伯朝端俊偉人燕居文會友得志澤加民自
是無心鏡俱傳有脚春成風運斤斧何處不參神
欲說澄江好丹青百雉樓山明新雨澤潮湧亂雲流賢
守聲先至疲民疾已瘳中興待良佐千里未分憂

題儀真天寧寺

短棹客千里炷香人小留禪房深寂寂世事易悠悠去
此兩槐夏驚予雙鬢秋鐘魚發新響作意為重遊

挽王漕稚川

紫荷餘愛在皂蓋填名城膏澤流千里嘉謀肅五兵林
泉多雅趣桑梓有深情道大雖難用詳觀月旦評
昆玉皆龍鳳唯公最白眉鄉邦好人物翰墨妙詞詩南
浦言猶在西山夢可疑我歸公已逝霰淚不勝悲

挽朱倅周卿

戚畹芝蘭秀儒宗金玉相解牛無肯綮馳驥阻康莊政
術今猶誦家風久益彰蘊藏初未試盛德付諸郎
自灑膏梁習人推道義尊蟾宮看桂子鳳穴見蘭孫遺

戒垂家法新詩斷客魂從今渭陽念極目灌城村

挽陳提舉

蘭壁雖期復蘇書竟不還慶餘鍾令緒才大壓塵寰勁
正三朝老從容半世閑會心真是老一笑別人間

志學屢辭爵傳家蔚有聲小官能抗疏文吏乃知兵守
法推彊禦輸忠沃聖明平生無所負讒口任蠅營

持斧威全振分符盜易殲真祠方賜逸榮養遽難淹許
國心如在繩家法正嚴莫悲才不盡祥覽卧寒苦

王提舉閭政錢夫人挽詩

閭闔由忠孝閨門仰靜專
儉勤天所賦容德古難全
雲謁疏華國霓旌返洞天
風霜孤鶴恨銜羽唳寒煙

山敞神仙宅人辭富貴家
靚容深莫識清節瑩無瑕
蚌脫珠方璨椿靈桂始華
他年容萬馬今日送千車

七言律詩

中秋下澣次計幕諸公佳什之韻

駒隙匆匆不暫留誰能宴坐學裴休
君携嘉客江亭醉

我泛扁舟楚澤秋，水浸斜陽紅影濕。
煙橫疊嶂，翠光浮。何時再卜秋屏約，共踏西風爛熳遊。

短櫂夷猶，任去留塵勞。今日暫休休，飛觴莫問重城晚。
攬鏡須驚兩鬢秋，千里歸艎何日到。一眉晴綠，與雲浮。
殷勤更問黃花信，準擬重陽一再遊。

次龔丈同叔高韻

備嘗險阻與艱難，久別松楸水一灣。
孤憤未申思北闕，雙眉初展見西山。
化工已定休言命，巧匠于今亦汗顏。

它日中興籌廟畧爲君一露管中斑

再用同叔韻

風定舟行力不難一鉤新月照溪灣
斷烟橫抹岸頭樹落日斜歎江上山
魚鳥久知思舊侶桑榆歸去亦慙顏
兒童見我應相怪兩鬢如何雪樣斑

題馬氏避暑宮開福寺蓮湖

金仙樓觀鬱嵯峨昔日曾開盛綺羅
不見園林蒙錦繡空教鐘鼓喚笙歌
印花寶甃封蒼蘚倚檻晴山擁翠螺

涼夜尚疑旌蓋在三千宮女襪凌波

和莫謙父韻

扁舟昨夜過黃州準擬籃輿作勝遊
卷地駭風迴岸脚撲天驚浪打船頭
一尊欲訪東坡隱兩鬢難禁宋玉秋
江上亂山雲色重却疑眉黛鎖閑愁

和葉宰

暫時行李已堪憂况是經年成漫遊
三月曉風紅掃地一犁春雨綠盈疇
從教征袖塵埃滿賴有新詩篋笥收

桃李主人能好事未歸誰復嘆淹流

過清江懷莫謙父

春來乘興泛孤篷
櫂影頻移鑑影中
昨夜忽添三寸雨
今朝尤喜一帆風
桃李白年年好水
綠青山處處同
屈指歸時花未老
一樽攜手過湖東

過前岡見毀松有感

夾道松陰若剪齊
前人種得幾多時
曾經行客頻相戀
試問鄉翁總不知
暗引風聲號綠野
密留雲影掛蒼枝

今人患物能如否祇有摧殘樵牧兒

當年種植到于今用力雖勞用意深巨蔭已容車馬過
盤根寧畏雪霜侵兩行冠劍大夫職十萬旌旗勇士林
烈日流金路無盡此時方識古人心

送運幹陳聖嘉解組還朝

月明千里正嬋娟且莫匆匆便放船三載泛蓮依綠水
一朝薦鶚上青天西樓未作經筵夢

六經詩詞
貯樓上

北闕先

分御鼎煙且向蓬山儺校了却持荷橐從甘泉

登梅仙壇觀中作

梅尉棲真昔已仙，祇餘巖谷正巍然。
老松作勢龍千尺，怪石擎空虎一拳。
樓與雲齊曾觀日，壇因斗建欲捫天。
如今勝景能長在，塵世應無海變田。

醮成作

心格崇霄禁路通，纖埃收盡見天容。
三千絳闕雲開鎖，十萬霓旌月印蹤。
香裊鬱葱翔鼎鳳，松搖寥廓狀雲龍。
虛皇夜宴長生殿，九奏瓊璈動曉鐘。

醮畢作

醮闌星斗挂脩甍綵蹕丹輿上玉清
百尺壇空雲弄影
一鈎簾捲月輸明
靈香匝地寒無力
寶奏鈞天靜有聲
萬里好風吹目斷
松篁猶學珮環鳴

登壇作

一壇橫壓紺天低
好向雲端覲紫微
林鶴慣聞金磬舞
烟鸞疑認玉臺飛
步虛聲徹空猶響
寶篆香銷露未晞
星斗繡天長不夜
疑乘風馭扣瑤扉

登裴公亭借用杜牧之登齊山詩韻二首

春晚風花片片飛登臨共惜景熹微
人生待足誰如意官况苦無胡不歸
且向園林窮勝事更憑山水發清暉
酒酣起舞君休笑直欲淋漓身上衣

風簾斜捲燕子飛天氣清和酒力微
極目烟波無盡藏關心春夢有時歸
香飄十里喧朝市翠積千山斷晚暉
杖屨不妨頻一到塵埃那解點征衣

同葉宰餞春淨衆寺

千尺飛虹跨碧溪綠陰沉水暗連堤馬蹄一踏沙頭滑
雲脚半垂山頂齊招隱疎鐘曾破夢洗春微雨不成泥
晚來放目郊園外萬點翻鴉散麥畦

游梅仙壇口占

籃輿破曉雨初收天氣正和麥正秋四合平林空翠滴
一川芳草亂青浮梅仙道館松全古馬祖禪關山更幽
擾擾紅塵竟何事此身宜老白雲秋

挽趙龍圖大卿

膠庠昔日共齏鹽窮達分携四十年南北阮門殊少長
東西施子異媼妍判花雋嗣躋三品司稼名卿正九遷
世事只須聊復爾秋堂明月豈長圓

臨江玉虛觀有牡丹思後圃亦正開恨不與集
絳苞翠幄壓朱欄秀色生香觀裏看小圃想須春爛熳
大家應是醉團欒名韁久縱心無累利徑雖馳興易闌
但願對花常酩酊莫思身外有悲歡

贈趙舍人

季父英名上玉津瞿曇抱送石麒麟龍文寶冊傳青瑣
鳳閣鸞坡近紫宸親老侍行知有子才高見忌豈無人
洪崖百仞泉飛玉一洗人間萬斛塵

挽韓漕直閣

忠憲勲名冠本朝傳芳五葉盡金貂芝蘭生子競秀發
松栢如公合後凋淮縣劇繁迎双解蜀邊姦慝望風銷
才高見忌何須病公道于今久寂寥

孳孳善政被民編謇謇嘉謨黼宸前萬卷詩書門戶壯

一生功業子孫賢夢回芳圃猶樽俎
淚落虛堂絕管絃
我始卜鄰君已逝茂林修竹亦淒然

平山堂

平山堂對妙高峯極目郊原萬里同
杳靄四垂天不盡
縈紆一帶水無窮城闌遙隔芙蓉浦
欄檻幾經楊柳風
想見風流賢太守一尊時復酹歐翁

西湖

曉來何事到湖西風急飛紅襯馬蹄
望信只愁秋雁斷

愛春還恨早鶯啼山連樓閣雲容重水浸欄干月影低
歸棹採菱重惜晚一聲歌過綠楊堤

過清渚

橫岡櫛比路彎環茅店無人晝亦關桑園霜枯乾葉舞
麥畦雨潤翠苗斑山風力壯嘯空谷溪水流清露瘦灘
斜崦乍明天地闊只疑身在碧壺間

清明日醉普光閣上

東郊綠暗已紅稀指準酴醾待我歸細葉急隨流水去

片心常望白雲飛半規殘日穿林薄一帶遙山抹黛微
起舞高歌共春酌凭欄無語欲忘機

發舟至至德觀

風細檣高去路遲曉烟秋色正霏微彎環沙嘴村市井
突兀江心古釣磯湧月小軒無盡藏參天老檣不勝圍
山川好處都輸與不是緇袍即羽衣

題本覺寺

春禽啼徹更含宮喚我精藍路易窮雨雪不垂成暮靄

花開都盡怨東風一川芳草低隨水滿眼青山半挿空
躍馬歸來尤寂寞此懷欲與故人同

題長沙倅廳磬沼

嘉名雅合泗濱浮玉振金聲第一流曲尺映橋橫錦帶
灣環沉月並瑤鉤清如有韻應儀鳳擊若無心可狎鷗
好向新亭按宮徵凌波聲動一簾秋

用子存韻寄乃兄雪香

要識居塵不染塵小窓容膝近東鄰香梢不老偏宜曉

瘦節常寒別是春
侑坐圖書情頗厚
對床風雨夢還新
擬將梅竹方兄弟
若說清高更逼真

七言絕句

和帥座勸農三首

光風駘蕩滿春亭
嶽麓雲開九疊屏
珍重元戎奉明詔
一犁膏雨曉痕青

指日追鋒數驛亭
論恩便合對丹屏
行看功業掀天地
陳跡俱堪入汗青

投老歸歟一草亭華門蕙帳對蘭屏自從濫吹紅蓮幕
孤負東風柳眼青

隅凡石

見說仙凡事不同道旁先問石屏風十洲三島不須去
絳闕瑤臺在此中

和陽運幹見招集句

漠漠窮陰斷送秋

簡齋

杖藜徐步向芳洲

杜子美

但將醅酌

酬佳節

杜牧之

一笑相從萬事休

簡齋

題壁

平蕪行盡又青山水遶寒堤綠一灣
征客紅塵自來去
碧林鳴鳥獨幽閑

欽定四庫全書

應齋雜著卷六

宋 趙善括 撰

詞

菩薩蠻

西亭

烟波江上西亭小
曉來雨過驚秋早
飛棟倚晴空
涼生面面風
癡兒管事了
獨自憑欄笑
何處有塵埃
扁舟歸去來

柳梢青

用萬元亨送冠之韻

愁別欣逢人間離合自古難同寫就茶經注成花譜何
事西東一樽良夜匆匆怎忍見輕帆短篷漢水有情楚
雲有意目斷飛鴻

鷓鴣天

和冠之韻

憶昔南樓舊使君與君攜手躡浮雲如今重到經行處

妙墨新詩得屢聞
淮路遠楚江分離樽相屬更論文
明朝一棹人千里多少紅愁與翠顰

又

我是行人更送行
瀟瀟風雨倍傷情
征航西去何須急
飛詔東來分外榮
紅袖濕玉樽傾不堪回首暮雲平
小舟准擬隨君去要聽霜天曉角聲

又

雨沐芙蓉秋意清
可人風月滿江城
憐風愛月方留戀

對月臨風又送行
人漸遠酒須傾
只憑一醉遣多情
重來休厭劉郎老
明月清風有素盟

沁園春

和辛帥

虎嘯風生龍躍雲飛時不再來試憑高望遠長淮清淺
傷今懷古故國氛埃壯志求申嫖姚未老早以家為何
謂哉多應是待著鞭事了稅駕方回稼軒聊爾名齊
笑學請樊遲心未開似南陽高卧莘郊自樂磻磻韜畧

傳野鹽梅植杖亭前集山樓下五桂三槐次第裁功名
遂向急流勇退肯恁徘徊

又

問舍東湖招隱西山惠然肯來有闕香蘭桂無窮幽趣
隔溪車馬何處輕埃微利虛名朝榮暮辱笑爾焉能浼
我哉閒歌枕被幽禽喚覺午夢驚回無言獨坐南齋
好喚取芳樽相對開待醒時重醉疎簾透月醉時還醒
畫角吹梅無用千金休懸六印荊棘誰能滿地栽人間

世任遊鯤獨運斤鷗低徊

又

千里風湍萬疊雲峯自相送迎歎扁舟如葉漂流如梗
片帆如箭聚散如萍家在東湖身來西浙非為區區利
與名堪憐處為雛饑犢暮狗苟蠅營平生何辱何榮
且一任三才和五行有鷗飛鵬奮鶴長鳬短朱顏富貴
白髮公卿印謾纍纍綬何若若休羨行歌朱買臣歸來
好向嚴灘垂釣谷口躬耕

滿江紅

和坡公韻

一雨連春東湖漲蒲萄新綠湖上露柳濃花豔綠圍紅
簇塵世難逢開口笑人生待足何時足況南州高士是
西隣人如玉行路唱誰家曲愁易感歡難續問軒裳
於我有何榮辱衆醉豈容君獨醒出林休恨風摧木歎
驚弦飛鳥尚知還安巢宿

滿江紅

艤舟南康作

三十年前曾向此，舞風歌月今依舊。
江山如畫鬢鬚如雪，故友冥鴻隨淨社。
舊詩秋蚓橫塵壁，賴廬峯對我眼。
偏青曾相識，開岫幌携山屐。
泉瀉布星飛石為收帆。
艤棹小留終日休，問重湖吹碧浪。
且同五老浮瓊液，待明朝鷁首向東飛。
清風力

滿江紅

坐間用韻贈朱守

騰茂飛英分憂顧自然風力千里靜江山改觀羽旄增
色鈴下風清公事少筆端雷動姦豪息聽宴香深處笑
聲長文章客丹詔自天邊得宣室對君心憶趁良辰
高會履珠簪碧和氣回春徵醞釀政聲報最惟清白看
揮毫萬字掃雲煙吳牋濕

鷓鴣天

和朱伯陽

畫鷁翩翩去似飛季鷹何事忽思歸風湍自送征帆穩

雲巘須將彩筆揮 江作酒海為巵為君滿酌不須辭
酒酣渴思回春夢自笑何時是足時

念奴嬌

重陽前數日風雨中携兒曹訪菊賦酌江月後
再携妻子待月于嵐光亭思恭蔣文寵和寄示
醉中操筆對月再用前韻

揚輝壁月照層臺縹緲蓬萊雲氣玉宇清明仙語近多
少怨紅愁翠問我殷勤幾年塵土依舊高標致廣寒別

後與誰曾共幽會 一日失脚人間十常八九底事如
人意狗苟蠅營真可笑何乃比予於是風月佳時江山
好處無復懷愁悴倚欄舒嘯六經時自心醉

醉落魄

趙監惠酒五斗以應重九之節至晚小飲賦之
重陽時節可憐又是天涯客扁舟小泊花溪側細雨斜
風不見秦樓月白 悵望斷無消息舉觴一笑真難得
歸兮學取陶彭澤採菊東籬悠然見山色

摸魚兒

和辛幼安韻

喜連宵四郊春雨紛紛一陣紅去東君不愛閒桃李春
色尚餘分數雲影住任綉勒香輪且阻尋芳路農家相
語漸南畝浮青西江漲綠芳沼點萍絮西成事端的
今年不誤從他蝶恨蜂妬鶯啼也怨春多雨不解與春
分訴新燕舞猶記得雕梁舊日空巢土天涯勞苦望故
國江山東風吹淚渺渺在何處

又

被楊花帶將春去飄揚一路無定滿庭綠蔭絲千尺枝
上舊香吹盡幽夢醒對曉色鞦韆院落人初靜柔條弄
影奈剪剪輕風冥冥細雨惹起萬千恨雲山路休躡
高樓獨凭楚天一抹煙暝嬌鶯百轉飛鴻去何處可尋
芳信心自省念咫尺青樓應恠人薄倖歸期將近料喜
鵲先知飛來報了日日倚門等

虞美人

無題

長空一夜霜風吼寒色消殘酒問伊今夜在誰行遺恨
落花流水誤劉郎尤雲瑞雨多情話分付阿誰也儂
家有分受悽惶只怕嬌癡不睡也思量

好事近

懷歸

月色透牕寒一夜素衾霜濕無寐起來搔首正參橫人
寂此心重省已回腸何況是行役欲棄利名歸去奈

楚天雲隔

鷓鴣天

翁廣文席上

枉道蠻堂是冷官，深深青瑣鎖青鸞。
新詩自得清歌舉，和氣都消永夜寒。
花態淨，酒杯寬，燕嬌鶯巧有餘歡。
不因客裏東陽瘦，好把西江一吸乾。

滿江紅

和李穎士

傳語風光須少駐共君流轉誰忍見綠肥紅瘦鮮歡多
感澤國千絲烟雨暗江城一帶雲山遠看新荷泛水學
人愁心常捲羞髻雪憑花染摧酒陣嫌盃淺嘆人生
豈為青衫槐板記舞可憐官柳細寫情但覺香牋短上
層樓獨倚有誰知欄干暖

水調歌頭

渡江

山險號北固景勝冠南州洪濤江上亂雲山裏簇紅樓

堪笑萍蹤無定擬泊葉舟何許無計可依劉金闕自帷
幄玉壘老貌貅問興亡成底事幾春秋六朝人物八
公草木不勝愁休學楚囚垂淚須把祖鞭先著一鼓版
圖收唯有金焦石不逐水漂流

好事近

春暮

風雨做春愁桃杏一時零落是處綠肥紅瘦怨東君情
薄行藏獨倚望江樓雙燕度簾幕回首故園應在誤

秋千人約

鷓鴣天

慶僉判王状元

玉殿分榮兩桂華
靈根移植在長沙
風姨先綻無雙藥
月姊重開第一花
金榜爛
玉音嘉
從今穩步上天霞
休誇水擊三千里
且聽絃歌十萬家

醉落魄

江閣

梯橫畫閣碧闌干外江風惡笑聲歡意浮杯酌秋水春
山相對稱行樂誰家青鳥穿簾幙暗傳空有陽臺約
天公著意秤停着寒色人情都恁兩清薄

梯橫畫閣月明江淨烟光薄碧山四繞闌干角一縷行
雲忽向盃中落歌櫻舞柳俱柔弱羅衣不奈江風惡
憑誰喚取雙黃鶴騎上瑤臺同赴金桃約

朝中措

惜春

東君著意在枝頭紅紫自風流貪引遊蜂舞蝶幾多春
事都休 三分好處不隨流水即是閒愁惟我惜花心
在更看紅葉沉浮

菩薩蠻

上嗣王生日

鵲橋巧霧隨風遠蟾宮皓影凝空滿一點壽星明祥光
徹太清 周公天子傳禮樂新封魯功業煥旗常鈞天
待玉皇

水調歌頭

趙帥生日

形勝視京兆警蹕駐錢塘
光前詔後彈壓誰數漢張王
幾百萬家和氣五十餘年創
見天下一循良有口皆歌頌
無地不耕桑
春過半花錦爛柳絲長
潭潭門衛森戟宴寢正凝香
笑攬吳山佳色醉挹西湖晴
灩童艾祝霞觴四海瞻華袞
千載待吾皇

滿江紅

辛帥生日二首

海嶽儲祥符昌運挺生賢哲天賦與飄然才氣凜然忠
節穎脫難藏衡斗劒誓清行擊中流楫二十年麾節遍
江湖恩威浹香穠直雲峯列觴羽急鯨川竭共介公
眉贊公賢業出處已能齊二老功名豈止超三傑侍吾
皇千載帶金重頭方黑

醉蓬萊

前題

正綵鈴墜蓋玉燕投懷夢符佳月五百年間誕中興人
傑杖策歸來入闕徒步萬里朝金闕貫日精忠凌雲壯
志妙齡英發名鎮重湖屢憑熊軾恩滿西江載分龍
節有志澄清誓擊中流楫譚笑封侯雍容謀國看掀天
功業待與斯民慶公華袞祝公黃髮

醉蓬萊

壽司馬大監生日

正百花堂下山雨樓前粲粲然梅柳和氣回春灑一尊

芳酒桂子蘭孫鳳歌鸞舞介我公眉壽天上遐齡人間
獨樂古來稀有壯日題橋兒時擊瓮名遂功成自然
長久琳館偷閒約赤城為友紫詔重攸黃扉穩步好試
調羹手九世雞窠千秋麟閣玉顏依舊

醉蓬萊

魏相國生日

正槐堂日永梅雨消塵麥風搖翠天祐昌辰誕中興嘉
瑞秀偉標姿從容謀斷笑吐平戎計漢節歸來邊塵掃

淨昂司榮貴 間世良臣威嚴輔政嫵媚承君道襟冲
粹玉券金丹稱功名成遂茂苑煙霞太湖風月聊伴凝
香醉補袞工夫調羹手段如今重試

瑞鶴仙

母氏生朝二首

月華凝露掌正極目鸞霄望風鯨壤深宮注遐想聽點
點花漏盈盈仙仗笙簫迎響降瓊輪元雲步障洞扉笑
別蓬瀛下應太平無象 俱仰姆儀春煦婦節永清道

風夷曠三遷教養金闕裏玉音賞况傳家清白滿堂朱
紫相對蘭蓀競長待齊秦湯沐疏榮賜靈壽杖

鵲橋仙

前題

星橋未就月鉤初掛翠葉暗驚秋早藥珠宮裏厭清閒
試回首塵寰一笑仙風道骨姆儀家範須信人間最
少一枝丹桂四蘭蓀况千歲靈椿未老

賀新郎

瑞香

絳雪堆雲綠倚朱
欄鸞飛鳳舞亂紅如簇
宮錦海沉肌理秀極目明霞孤鶩對翠袖
天寒修竹輕露有情添淚眼
聚精神嬌醉薰華屋
燃寶篆散清馥江南到處多
蘭菊更海棠貪睡未醒
湯山麈俗欲品此花為第一
真色生香俱足又只恐驚人
凡目把酒對花頻管領
怕狂風驟雨難拘束
拾碎玉泛醺醪

霜天曉角

送林興國之任

楚江風色一夜波翻雪
蟻岸錦帆不度天有意且留客
鼓聲催去急離觴須舉白
看取芳菲時候日邊聽好消息

水調歌頭

席上作

碧雲初返岫
潦水正鳴灘
蘭舟容與歌舞偏
稱笑中看燭影烘寒成暖
花色照人如畫
一坐有餘歡
酒灑浮金

殘香縷靄彫盤 碧簪橫銀漏永玉樽乾
喧春鼓吹翠袖起舞佩珊珊記得山明水秀
何處朝雲暮雨常在夢魂間多少難言事都付兩眉彎

念奴嬌

呂漢卿席上作

曉來膏雨報一犁豐信幾枝嬌色岸草汀沙明似鏡不
到塵埃花陌急管繁絃香車寶勒正阻尋春客東風特
起半空微露晴碧 何況主意深勤水清才藻玉潤真

珪壁翠麓華堂橫枕水波底斜陽紅濕蓮社風流桃溪
標致便覺凡心息玉樽傾盡笑中歸步鉤月

又

江南到處被波光雲影留人行色昔我來時春正好舞
絮飛南陌今日登臨讀書齋上重作憑欄客清溪數細
夜來微漲新碧兩岸蘸水濃陰斷虹橫幃一帶連環
壁林外青山千萬疊雨歇半空猶濕已倩雙鱗更須靈
鵲先報歸消息歸來征袖盡攜千里風月

鵲橋仙

留題安福劉氏園

花腮百媚柳絲千尺密影金鋪碎日過雲微雨報清明
半天外煙嬌霧濕當歌有恨問春無語笑我如何久客
小園歸去又殘紅便席地飛觴尚得東風喚我西園
閒坐大醉高歌竟日行藏獨倚畫欄干便忘了征衫泪
濕亭高煙遠天低雲近相對逃名隱客掀髯無語看青
山斷不信塵埃到得

清平樂

和石次仲

斷雲漏雨依約西山暮
風定檣高須小住
不忍帶將春去
此行抑有求歟
青衣擬問馮都
萬里一鉤新月
相忘常在江湖

水調歌頭

和黃舜舉吳門二詠

危臺枕城端
今昔幾人遊
遶城碧水一帶茂苑與長洲

寂寂彈琴峯外萼萼採香徑畔橫截古溪頭極目暮雲
合宋玉正悲秋 峴山碑帝子閣庾公樓當時風物如
今煙水只供愁處處山明水秀歲歲春花秋月何必美
南州故國未歸去萍梗歎漂流

雨霽彩虹卧半夜水明樓太湖極目四面水盡是天流
幾點鱸鄉菰浦萬疊鯨波雪浪掀舞小漁舟金餅掛蟾
魄時景正中秋 釣綸輕蘭棹穩笑玉侯一簑一笠得
意何必美封留縱使金章鼎貴何似玉尊頻到一醉可

消愁三士在何許喚起與同遊

水調歌頭

奉餞冠之之行

佳客志淮海賤子設樽壘楚江昨夜清漲短棹已安排
休問南樓風月且念陽臺雲雨幾日却重來銀燭正凝
泪畫鼓且休催彩雲飛黃鶴舉兩徘徊林泉歸去高
卧回首笑塵埃我唱更憑君和君起雖同我舞莫惜玉
山頽它日揚州路散策願相陪

前調

餞吳潛

浩歎對清史循吏久無聞二年江右賴公華節布陽春
纔自褰帷問俗無復埋輪當道一路書澄清多少攀轅
意不待及瓜人駐膏車遲祖帳倒離樽滿庭桃李綠
陰何處不深恩此去玉音應問底事金園微減憂國更
憂民造膝一言語四海入洪鈞

滿江紅

錢京仲遠赴湖北漕

雨沐風梳正梅柳弄香遲色誰忍聽送南浦陽關三疊
玉節前驅光昭路金杯爭勸愁生席泛錦檣西去若登
仙乘槎客春有意寒無力和風滿洪波息笑廬峯湓
浦舊遊陳迹昔日飛聲臺柏勁他年坐對堂槐密想輶
車不待政成時追鋒急

滿庭芳

用洪景廬韵

蝶粉蜂黃桃紅李白春風屢展愁眉曉來雨過應漸覺
紅稀滿徑柔茵似染新晴後皺綠盈池休辜負幕天席
地逸飲醕金彘東君真好事絳唇歌雪玉指鳴絲念
長卿多病非藥能治試假搖琴一弄清音轉便許心知
從今去園林好在休學峴山碑



